

Presidi resta an Tumliastga

Gion Nutegn Stgier/FMR

Nik Bleuler è igl nov president dalla Federaziun Grischuna digl Sport da Teir. El surpeglia chest mandat da Carl Frischknecht tgi è sto igls davos seis onns agl timung da chell'uniun cun 4500 commembers.

A St. Peter aint igl Scanvetg ò gia li la 143avla radunanza da delegos dalla Federaziun Grischuna digl Sport da Teir. Dasper igls 145 delegos èn er stadas dalla parteida numerosas persungas dalla politica communal, regiunala, cantunala e naziunala, digl militar e dallas federaziuns da teir cantunalas vaschignas. Tema central dalla radunanza da delegos è stada la tscherna d'en nov president u d'ena nova presidenta per l'Uniun da teir cantunala.

27 vouchs duple per Nik Bleuler

Per la successiun da Carl Frischknecht (Tumegl) èn sa mess a disposiziun Nik Bleuler (Masein) ed Esther Hug (Vaz Sut). El ed ella èn gio da blers onns angascheas fermamaintg per igl teir, seia chegl activ ubagn davos las culissas. L'elecziun è stada da gronda tensiun, vevan tant Nik Bleuler scu er Esther Hug las qualitads da davantar successour ubagn successoura digl president partent. Nik Bleuler è igls davos onns sto fitg activ cun promover tiradours e tiradouras dalla garda giovna. Ed Esther Hug è stada igls davos seis onns secretaria e magnagestiun dalla Federaziun Grischuna digl Sport da Teir ed ò fatg chegl cun gronda passiuin e saveida. Eligia è



Carl Frischknecht (san.) igl president partent dalla Federaziun Grischuna digl Sport da Teir cun Filip Dosch, igl nov uffizier da teir federal digl Grischun.

alloura nia Bleuler – e chegl cun en resultat dad 86:59 vouchs. Fiss Esther Hug neida eligida scu presidenta, fiss ella stada l'amprema donna an chest uffezi ainten l'istorgia da 143 onns dall'uniun tgi reunescha igls tiradours e las tiradouras digl Grischun.

Bler applaus per igl president partent

Hubert Tomaschett (Rabius) ò tignia la laudatio per Carl Frischknecht, igl president partent dalla Federaziun Grischuna digl Sport da Teir. Da dastger tigneir chella laudatio seja per el ena veira onour, ò punctuo igl vicepresidente dall'uniun. Frischknecht seia sto en parsoura da vaglia, ena persunga fidada, en om plagn angaschamaint ed en amei stimo da tiradours

e tiradouras. Sia gronda lavour a favour digl teir e da la federaziun seia stada immensa ed er exemplarica, ò menziuno Hubert Tomaschett. Carl Frischknecht sez è sa musso fitg emoziunal cun piglier cumgea digl sies uffezi. Agl avigneir resta el venavant fidevel scu commember dalla grupp da matscheurs grischuna.

Testifitgias an lour uffezis èn nias Christian Kühnis (Tavo-Monstein) scu schef teir 300 meters ed Anna Marugg (Coira) scu schefa pistola. Nov cassier e magnagestiun dall'Uniun da teir cantunala è Walter Hartmann (Pragg-Jenaz). Blers plets da lod ò er retschet Jöri Kaufmann (Caira), igl uffizier da teir federal partent dal Grischun. Gio en uffezi è ses successour Filip Dosch (Cunter).

Festa da teir federala 2026

Sa drizzos alla raspada èn er Peter Peyer igl president dalla regenza grischuna ed igl divisiunari Lucas Caduff. Tots dus on menziuno l'impurtanza digl teir per la cuminanza, la societad, la siertad ed er la solidaritad. Bunas novas èn er neidas digl Cunsegl naziunal e president da chel gremi, Martin Candinas. El è president digl comité d'organisaziun dalla Festa da teir federala 2026 tgi ò li an treis onns en il Grischun. Da preschaint ins seia ferm an contact cun las uniuns da teir purtadas dalla festa ed alloura er cun igl concept da sponsoring, ò detg Martin Candinas. Tenor plan marscha er l'organisaziun dalla Festa da teir cantunala 2024 an Nagiadegna ed ainten las vals igl sid grischunas. Bunamaintg 8000 tiradours e tiradouras vignan ad esser dalla parteida a chella occurrenza da teir cantunala igl onn proxim durant igl meis da zarcladour.



Politica ed armada reunida: (da san.) igl conseglie digls cantuns Stefan Engler, igl divisiunari Lucas Caduff e Martin Candinas, conseglie naziunal e president da chel gremi. Fotos Gion Nutegn Stgier